




*Senen, 13 Mei 2024*  
**Ogen: Sepanya 2:4-15**



**Senang Mulihi**



**G**eluh i tengah situasi sulit, itindas, itekan maba kekoten dengen bene pengarapen. Bangsa si kelengi Tuhan sangana ngalaken perbeben si mberat. Enterem bangsa sideban ngelakoken perbahanen si erbahanca ceda ate. Kalak Pilistin, Kalak Moap ras Amon, megombang dengen naling-naling kegeluhen bangsaNa. Biak kiniganjangen ukur siengkuasai bangsa enda. Iidah Dibata kerina perbahanen bangsa-bangsa e man bangsa Juda. Ceda ate pe turah me. Pengarapen pe menam bene. Guna si e ipadanken Tuhan maka bangsa-bangsa si megombang nandangi bangsa Juda e lit pagi paksana ialokenna me ukumen bas Dibata nari. Inubuatken maka ikerneppen Dibata me pagi bangsa Pilisti seh maka inganna tading pe ikuasai bangsa Juda. Bangsa Moap ras Amon si meganjang rukur pe iukum, Asyur ikerneppen, seh maka kuta-kuta e pe dungna melungen janah seh lungenna. Si enda kerina jadi erkiteken Dibata kap ras bangsaNa, dengen ibahanNa me i bas paksana senang ka me mulihi iakap bangsaNa e.

Erlajar arah kata sinisehken nabi Sepanya enda, ibabai kita selaku moria banci tetap megenggeng dengen erpengarapen man Dibata tupung ngalaken kiniseran entah perbeben. Tupung paksa kesusahen e nderpa kegeluhen, lit nge deba sierusaha tole ndabuhkan, naling-naling dengen megombang nandangi kai si sangana jadi e. Tempa lit penggejapen kerina nalahkan kegeluhen. Lanai lit teman, lanai lit si mbela kita pe. Ranan-ranan si seh ku bas cupingta e erbahanca latih ertangkel ras ceda pusuh. Amin bage gia ingetlah kai silakoken dengen siipadankenNa ndube: adi Dibata ras kita maka senang ka me pagi mulihi. IsalihkenNa me iluh si mbambur e jadi lau si malem-malem. Bagenda me pengarapen si tetap ipebelin i bas pusuhtha segelah tetap kel ukurta, rembak ras IA. Labo ndekah kesusahen enda, tek lah kentisik nari icidahken Diata me kuasaNa si mbelin e. E maka pengarapen si enda pasti mereken semangat ras gegeh si mbaru kap.

☞ *“Bas Dibata ngenca lit kesenangan e, tetaplai ras IA”*

